

आकाशवाणी

- प्रधानमंत्री नरेन्द्र मोदी अज्ज नमीं दिल्ली च फिजी दे अपने हमरुतबा सिटीवेनी राबुका हुंदे नै गल्लबात करगंन।
- प्रधानमंत्री होर अज्जै थमां गुजरात दे दंऊ दिनें दे दौरे पर होगंन जित्थे ओ केंई विकास परियोजनाएं दा शुभारम्भ करगंन।
- रूस च भारत दे राजदूत विनय कुमार होरें आक्खेया ऐ जे भारत ओकड़ी थाहरें दा तेल खरीददोग जित्थुआं अपने राष्ट्रीय हितें दी सुरक्षा लेई भारत गी सब्भनें शा बदियां सौदा थहोग।
- केन्द्रीय मंत्री मनसुख मांडविया होरें आक्खेया ऐ जे भारत 2047 तोड़ी खेड्डें दे खेतर च दुनिया दे 5 अक्वल दर्जे दे मुल्खें च शामिल होने दी तांग कन्ने अगगे बदा करदा ऐ।
- शर्वरी सोमनाथ शिंदे होरें विश्व युवा तीरअंदाजी प्रतियोगिता च 18एं बरे शा घट्ट उम्मी दी श्रेणी तैहत सुन्ने दा तगमा जितेया ऐ।

<><><><><><>

PM Fiji Counterpart

प्रधानमंत्री नरेन्द्र मोदी होर अज्ज नमीं दिल्ली च फिजी दे प्रधानमंत्री सितिवेनी राबुका कन्ने गल्लबात करगंन। श्री राबुका त्रंऊ दिनें दी भारत यात्रा पर कल नमीं दिल्ली पुज्जे हे। राबुका हुंदे कन्ने उन्दी घरें आहली सुलेती राबुका होर बी भारत आइयां न। फिजी शा आए दे शिष्टमंडल च स्वास्थ्य ते चिकित्सा सेवा मंत्री रातु अतोनियो ललाबलावु ते वरिष्ठ अधिकारी शामिल न। केन्द्रीय मंत्री जे.पी. नड्डा होरें कल शामी लै श्री राबुका कन्ने मलाटी कीती।

विदेश मंत्रालय दे इक ब्यान च आकखेया गया ऐ जे प्रधानमंत्री राबुका हुंदी एह पैहली भारत यात्रा ऐ। इस दौरान ओह राष्ट्रपति द्रौपदी मुरमू हुंदे कन्ने बी मलाटी करगन। इस यात्रा कन्ने भारत ते फिजी दे सरबंध होर मजबूत होगन। दौने देशे सब्भने खेतरे च दपकखे सरबंध ते लोके बशकार सम्पर्क बदाने दी प्रतिबद्धता व्यक्त कीती ऐ।

<><><><><><>

PM-Gujrat

प्रधानमंत्री नरेन्द्र मोदी अज्जे थमां दऊं दिने दे गुजरात दौरे पर होगन। ओह अहमदाबाद च 5 जहार 400 करोड़ रपे दी विकास परियोजनाएं दा उद्घाटन करडन। श्री मोदी होर इक्क सभा गी बी संबोधित करडन। गुजरात यात्रा दे दूए दिन, प्रधानमंत्री अहमदाबाद दे हंसलपुर च हाइब्रिड बैटरी इलेक्ट्रोड उत्पादन दा उद्घाटन करडन। ओह बैटरी कन्ने चलने आहले सौ देशे गी निर्यात होने आहले इलेक्ट्रॉनिक गड्डीं दी खेप गी बी हरी झंडी दस्सडन। प्रदेश दी यात्रा दौरान श्री मोदी 1 जहार 400 करोड़ रुपये लागत आहली रेल परियोजनाएं गी बी राष्ट्र गी समर्पित करडन। ओह विरामगाम-खुदाद-रामपुरा रोड दे विस्तारीकरण दा उद्घाटन बी करंगन। श्री मोदी अहमदाबाद-मेहसाणा-पालनपुर रोड पर छह-लेन आहले अंडरपास दे निर्माण दी आधारशिला बी रक्खंगन। ओह अहमदाबाद-विरामगाम रोड पर रेलवे ओवरब्रिज दा बी शिलान्यास रखडन।

<><><><><><>

Ind Anb Russia

रुस च भारत दे राजदूत विनय कुमार होरे आकखेया जे भारत अपने राष्ट्रीय हित दी रक्षा आस्ते हर उपा करोग ते जित्थुआं बी सस्ता तेल थोहग, खरीद जारी रक्खोग।

रुस दी समाचार एजेंसी गी इक इंटरव्यू च श्री विनय कुमार होरें आक्खेया जे रुस कोला तेल खरीदने दे कारण भारत शा आयात पर 25 फीसद शुल्क बदाइयै कुल 50 फीसद करने दा अमरीका दा फैसला पूरी चाली गलत ऐ। उनें आक्खेया जे भारत दी ऊर्जा नीति दा मकसद अपने नागरिकें आस्तै विश्वसनीय आपूर्ति सुनिश्चित करना ऐ ते रुस ते होरनें देशें कन्ने ओहदे सहयोग नै वैश्विक तेल बाजार दी स्थिरता च योगदान देना ऐ। श्री विनय कुमार होरें आक्खेया जे भारत ते रुस दा बपार परस्पर हितें ते बाजार कारकें कन्ने संचालित ऐ। उनें आक्खेया जे अमरीका ते यूरोपीय देशें सनें होरनें देश बी रुस कन्ने बपार करदे न।

<><><><><><>

DRDO

रक्षा अनुसंधान ते विकास संगठन-डी.आर.डी.ओ नै एकीकृत हवाई रक्षा शस्त्र प्रणाली दा कल ओडिशा तट कश पेहला सफल परीक्षण कीता। इस बहु-स्तरीय स्वदेशी प्रणाली च ज़मीन थमां हवा च मार करने आहली मिसाइल, घट्ट दूरी दी उन्नत हवाई रक्षा प्रणाली आहली मिसाइल ते लेजर-चालित निर्दिष्ट एनर्जी शस्त्र शामिल ऐ। परीक्षण उड़ान दरान इस प्रणाली थमां बक्ख-बक्ख दूरी पर स्थित त्रै लक्ष्यें गी सफलतापूर्वक नष्ट कीता गया। इस अवसर पर संगठन दे वरिष्ठ वैज्ञानिकें दे अलावा सशस्त्र बलें दे प्रतिनिधि बी मौजूद हे। रक्षा मंत्री राजनाथ सिंह होरें परीक्षण उड़ान दी सफलता पर डी.आर.डी.ओ दे वैज्ञानिकें, सशस्त्र बलें ते रक्षा उद्योग गी बधाई दिती ऐ। उनें गलाया जे इस अनूठी प्रणाली की सफलता कन्ने देश दी बहु-स्तरीय हवाई सुरक्षा क्षमता स्थापित होई ऐ ते इससे देश दे रक्षा प्रतिष्ठानें दी सुरक्षा मज़बूत होग।

<><><><><><>

## Sports Ministers

खेड्ड मंत्री मनसुख मांडविया होंरे आक्खेया ऐ जे देश दा 2047 तगर यानि आजादी दे 100 बरे पूरे होने तगर दुनिया दे अक्वल 5 खेड्ड राष्ट्रें च शामिल होने दा लक्ष्य ऐ। अहमदाबाद च कल राष्ट्रमंडल वेट लिफ्टिंग चैम्पियनशिप दे उदघाटन समारोह गी सम्बोधित करदे होई, मंत्री होंरे आक्खेया जे, प्रधानमंत्री नरेन्द्र मोदी हुंदी अगुआई च, मुख्खे च खेड्डे दे क्षेत्र च सदा थमां प्रगति होई ऐ ते इस क्षेत्र च केई सुधार ते बदलाव कीते गेन। उनें आक्खेया जे प्रधानमंत्री होंरे अगले 10एं बरे च देसै गी दुनिया दे 10 अक्वल खेड्ड राष्ट्रें दी सूचि च शामिल करने दा लक्ष्य मित्थे दा ऐ।

<><><><><><>

## Public Speak

आकाशवाणी दा समाचार सेवा प्रभाग अज्ज रातीं साड्डे 9 बजे हफ्तावर फोन इन कार्यक्रम “पब्लिक स्पीक” च ऑनलाईन गेमिंग दे नियमन विषय पर इक विशेष परिचर्चा प्रसारत करोग। एहदे च हिस्सा लैगन, इलैक्ट्रानिकी ते सूचना प्रोद्योगिकी मंत्रालय दे सचिव एस. कृष्णन। श्रोता कार्यक्रम दे दौरान स्हाडे स्टूडियो च मजूद माहिर कोला ऑनलाईन गेमिंग पर नमें कनून, एहदी आदत पर रोक लाने ते एहदे नै होने आहली पैहे दी तबाही ते नुक्सान कोला सुरक्षा यकीनी बनाने बारे सोआल पुच्छी सकदे न। सोआल पुच्छने लेई टैलिफोन नम्बर न- 011-2371-7117 ते 011- 2331-4444.

श्रोताएं इस बारै सोआल व्हेटऐप नम्बर 928-909-4044 पर बी पुच्छी सकदे न। जिसलै जे हैशटैग आस्क AIR कन्ने X पर बी सोआल पोस्ट कीते जाई सकदे न। चेता रक्खेयो अज्ज रातीं ए कार्यक्रम साड्डे 9 बजे, आकाशवाणी दे FM Gold चैनल पर उपलब्ध होग।

<><><><><><>

## Israel Gaza Offensive

इस्राइल नै गाजा पर हमले जारी रखने दा संकल्प लैता ऐ। इस्राइल दे रक्षा मंत्री इस्रैल काट्ज होरें आक्खेया जे इस्राइली रक्षा बल हमास गी हराने, सब्भै बंधकें दी रिहाई सुनिश्चित करने ते युद्ध समाप्त करने आस्तै पूरी ताकत कन्नै हमला जारी रखोग। श्री काट्ज होरें शुक्रवार गी आक्खेया हा जे अगर हमास, युद्ध समाप्त करने आस्तै सब्भै बंधकें दी रिहाई ते इस खेतर पर इस्राइल दे स्थायी सुरक्षा नियंत्रण दी शर्तें पर सहमत नैई हुंदा ते गाजा गी तबाह करी दिता जाहग। एहदे शा पैहले इस्राइली फौज नै आक्खेया हा जे, उने उत्तरी गाजा पट्टी दे जबालिया पर हमले बद्धाई दिते न। फौज नै आक्खेया जे अतिरिक्त खेतरें च हमले बदाने दा मकसद हमास लड़ाकें गी फेर संगठित होने शा रोकना ऐ।

<><><><><><>

## Archery

भारत दी शर्वरी सोमनाथ शिंदे होरें कनाडा दे विनिपेग च आयोजित, विश्व युवा तीरअंदाजी प्रतियोगिता दी अंडर-18 व्यक्तिगत रिकर्व स्पर्धा च सुन्ने दा तगमा जितेया ऐ। शर्वरी नै रोमांचक फाइनल च दक्खन कोरिया दे किम येवॉन गी 6-5 कन्नै हराया। शिंदे इस प्रतियोगिता च सुन्ने दा तगमा जितने आहली दुई भारतीय महिला न। शनिवार गी चिकिता तानीपार्थी नै अंडर-21 व्यक्तिगत कंपाउंड स्पर्धा दा खिताब जितेया हा। उनें कोरिया दी येरिन पार्क गी 142-136 कन्नै हराया हा।

<><><><><><>

## DMRC Fare Hike

दिल्ली मेट्रो रेल निगम DMRC लिमिटेड नै मेट्रो करारं च किश बाद्दे दी घोषणा कीती ऐ। इक सोशल मीडिया पोस्ट च DMRC नै आक्खेया ऐ जे एह बाद्दा बड़ा ममूली होग ते यात्रा दे छिंडे दे अधार पर इक रपे कोला 4 रपे तोड़ी कराया बधाया जाहग।

एयरपोर्ट एक्सप्रेस लाइन लेई 5 रपे तगर दा बाददा कीता जाई सकदा ऐ। नमें कराए अज्जे थमां लागू होई जागंन।

<><><><><><>

IMD Weather

मौसम विभाग नै अगले दंऊ दिने च देसै दे उत्तर -पच्छमी हिस्सें च बड़ी मती बरखा बरने दा ऑरेंज अलर्ट जारी कीता ऐ। गुजरात, ओडिशा, राजस्थान ते उत्तराखंड दे किश इलाके च बड़ी तेज ते भारी बरखा होई सकदी ऐ। अरुणाचल प्रदेश, असम, मेघालय, बिहार, छत्तीसगढ़, आंध्र-प्रदेश दे समुन्द्री इलाके, पंजाब, दिल्ली, हिमाचल प्रदेश, जम्मू-कश्मीर, लद्दाख, गिलगित बलितस्तान मुजफराबाद, उत्तर-प्रदेश, झारखंड, कोकण ते गोआ, मध्य-प्रदेश, पच्छिम बंगाल दे हिमाली क्षेत्र ते सिक्कम दे किश हिस्सें च बी अज्ज तेज बरखा बरने दी संभावना ऐ। इनें सब्भनें थाहरें अगले दंऊ दिने तगर इयै नेहा मौसम बने रौहने दी चेतावनी जारी कीती गई ऐ।

<><><><><><>